

淮寧縣志

第五冊

卷十七
十九

淮寧縣志卷之十七

辛酉科舉人河南陳州府淮寧縣知縣永銘纂修
名宦傳

司馬遷曰法令所以導民也刑罰所以禁姦也奉
職循理亦可以爲治何必威嚴哉自史記立循吏
傳漢書因之若黃霸朱邑等所居民富所去見思
生有榮號死見奉祀庶幾德讓君子之遺風矣夫
先事之勞後事之師陳之令長見于史傳者雖缺
有間自明以來則猶彰彰可考也述名宦傳

漢

韋義字季節扶風平陵人少知名順帝時爲陳縣令
政甚有績官曹無事牢獄空虛數上書宜依古典考
功黜陟徵集名儒大定其制又譏切左右貶刺竇氏
久抑不遷以兄順喪去官比辟公府不就及卒吏民
爲義舉哀若喪考妣

舊志名宦載漢黃昌按黃昌在後漢書酷吏傳本
非名宦且後漢書云宛令舊州志訛爲宛上舊縣
志仍其謬不知宛上縣名至隋開皇初始置漢時
只有陳縣無宛上縣也種種舛錯特爲訂正

宋

孫思恭字彥先鄧州人擢第後爲宛丘令遷轉運使
以水災時調春夫爭之弗得棄官去後以吳奎薦補
國子直講累官天章閣待制性不忤物犯而不校篤
於事上有所見必密疏以聞帝亦間訪以政云
楊仲元字舜明管城人第進士調宛丘簿民訴旱守
拒曰邑未嘗旱狡吏導民而然仲元曰野無青草公
曰晏黃堂宜不能知但一出郊可見矣狡吏非他實
仲元也竟免稅後歷官五十年未嘗以私怒加人法
有兩比必傳輕典曰吾以是報國也卒年七十五
郝戴字伯牙石州定胡人家貧不妄受貸舉進士調

宛丘尉時年未五十以父樵老不第上書請致仕爲
父求官執政諭使赴官而後請曰如是則可升朝籍
遇恩及親矣于是留妻子于家獨奉父行踰歲竟謝
事上官以其有治績固留之耆老遮道不能止授太
子中允以歸未至家而樵卒自畚土廬墓有助之者
使置土墓上去則遂撒之州以狀聞詔賜粟帛治平
末呂公著薦辟不就姻族語其妻聶氏使勸戴仕聶
曰吾不德無以助君子敢強所不欲以累其高哉篤
行苦節不仕而卒聶事舅姑亦以孝著司馬光銘其

墓

明

劉恭獻陝西人洪武四年以秀才舉知陳州時兵戈方息百姓流移田野未闢恭獻招撫安集均平稅役期年民復業者五百餘戶遂建社學立師長令民間子弟八歲入學在任四年卒民哀慕之

李子義江西人洪武壬戌以秀才舉知州事勤儉敦禮時學校生徒尙少子義選俊秀入學課讀州地卑下頻患水子義築堤爲備河雖間溢竟不爲災

陳价陝西南鄭人舉進士永樂癸卯知州事以德化民政平訟簡尋以憂去陳民思之正統初服闋州民

計期叩閤請復任詔許之未至而卒

馮莊甫蘇州人永樂初署州學正時承元後草萊未闢學校未興莊甫以身先之勸士興學謹身循禮多士欣然奮起于學凡稱良師者必以莊甫爲首

張志道江南武進人貢太學正統丁巳知州事蒞政廉明教民耕織越二年蝗四起志道禱于神蝗不入境歲大熟

周庠湖廣麻城人正統中知陳州緩刑罰興學校復業之民計口授田教以種植居數年富庶百姓戴之如父母

萬宣江南當塗人領鄉薦景泰丙子知州事蒞政嚴明約束胥吏無敢蠹民者時境內多盜悉捕得之置於法一郡肅然部使者上其績詔旌異焉

戴昕江南上海人領鄉薦天順間仕臨彰令有聲擢知陳州興學校飾陵寢修古蹟爲政廉明仁恕士民德之

朱祥字應和江南盱眙人舉於鄉成化間以青州司理擢知陳州祥敏於有爲仁慈撫下修義陵葺孔廟興庠序平徭役植桑棗障水患給民耕牛築明化堤建里甲營施藥卹老諸善政表表一時實賢守云

倪誥字汝制直隸阜城人由舉人弘治庚戌知州事
宅心仁恕處事明敏薄稅歛治豪頑弭盜安良增置
吏舍行署修拓聖殿號房秩滿擢湖州郡丞民爲立
碑記德

白思義山西平定州人弘治庚申知州事廉平蒞政
減賦輕徭尤善於釐剔弊蠹奸滑斂迹陳地歲苦水
思義築堤爲禦復大濬其流賴以免患解署庫樓學
舍一新以至祭器神龕靡不潤飾治聲大著監司交
薦擢永州府同知

洪蒸浙江平湖人辛未進士知陳州釐奸剔蠹其調

驛獎徵銀解衛郡陳人稱便又訓課士子諄諄不倦
癸酉丙子二榜舉于鄉皆所識拔士也六年陞兵部
員外郎陳士民攀轅臥轍數百里爲立祠尸祝之

王懋字德孺蕪湖人甲子舉應天鄉試屢上春官不
第以銓試第一授湖州郡丞有異政尋爲郡中奸黨
所中謫知陳州下車獎進文學士林嚮往翕然以爲
得師歲大祲斗米千錢爲發廩作糜以賑大疫爲設
醫藥所活甚衆巨豪某持吏短長懋置於法遷彰德
丞再補衛輝丞尋晉刑部員外郎恤刑平反四百有
奇丁酉卒于京

楊堪性剛毅果於任事萬歷乙未以靈寶令擢知陳州甫蒞任值河決立樓岡害民居堪率丁夫堵塞而波濤洶湧不及措手堪長跼水中移時水遂退閱二旬告竣凡修河渠十餘道陳雖卑下藉此少免水患居官不避強禦犯者立寘之法刁惡股栗秩滿擢蘇州府同知州民焚香泣送遮道不能行競建生祠以祀堪山東禹城人嘉靖辛酉貢士

康應乾字一之直隸鵝澤人甲辰進士知陳州洞悉利弊決訟如流上當事浚河開荒八議皆著爲法程若兌軍及易俵馬以軟擡尤爲民便勤課諸生文風

爲之一變擢南刑部行李蕭然圖書數卷而已城北立生祠及去思碑

湯師頊字啟英其先桃源人後爲貴陽人萬歷戊子舉于鄉典校粵西永福轉北成均擢順天府別駕陞治中爲府尹所排謫陳州居官鎮靜清和蒞陳二載里甲不侵行戶不擾商民化之恥奔競而守禮義以故賓客往來無可干瀆者多不得其懽心尋解組歸里陳人思之不置云

王堯封字爾祝江南金壇人少負才名癸未進士授戶部主事晉員外郎中督稅監兌有廉能聲忤銓宰

出知南昌府尋謫貳陳州首肩志事開局延士徧搜
藏書逾年成帙未及梓捐家藏副本與州人所購書
共二千餘卷置學宮課士校藝甄品尤精累官戶部
郎中知思南府不就致仕生平亢直不合於時識者
謂如大冬嚴霜百草萎死而松柏挺然獨秀云

李龜秦州人薦于鄉天順間陳州州同居官廉幹鞠
訟必求其枉直民有衡鑑之譽後擢隆慶州知州

間調羹汝南新蔡人萬歷乙巳以孝廉秉鐸陳州工
古文詞擲管數千言倚馬可待談經校藝獎進後學

孜孜不倦諸生有被侮者爲伸其抑故刁風息而士

氣振每吟詠輒有佳句直逼唐音陳人傳誦之丁未
成進士爲戶郎遷山西副使

趙師尹江西德安人庚子舉于鄉丁未署州學正性
恬澹端莊士子莫敢踰其教制義獨挾精奧學者宗
之癸丑登進士授翰林院編修

侯君擢字際明成安縣舉人崇禎十四年知陳州潔
已愛民有惠政闖賊圍城君擢守北門身先士卒運
木石擊賊尸滿壕中城陷君擢正色危坐賊執令跪
不屈縛至李自成前罵愈甚賊衆擁出劍面砍膝始
戕其生事聞贈右叅議

國朝

高民望三韓人知陳州兵亂甫定邑里蕭條多方安輯民旣復業乃修城垣衙署學宮神祠次第具舉陳民苦於驛馬民望曰驛馬收解是有司事何煩苦百姓爲于是客至輒給以百錢客有愧色戒勿擾民得安枕性寬仁而賞罰嚴明獄無枉滯居官啖蔬衣布如寒素風擢南康知府陳民思之

方于光大興人進士康熙元年知陳州事政清事簡百廢俱興慕宋蘇子由之爲人重建讀書亭日與同年友莫爾淮等講誦其中時人比之潁濱簡夫又建

修鐘樓以培文脉陳人至今思之

姚廷佐直隸青縣人順治乙酉副榜以布政司經歷
署陳州篆務清廉明恕仁慈公溥行之日攀轅截鐙
者殆萬餘人無不流涕送至省城二百餘里不忍別
孫芳字馨如饒白旗世族以正四品外轉知州蒞陳
時廉潔勤敏革編審陋規八百餘金撥置墾荒官員
安插閭閻兵各得其所民無擾累白蓮教煽亂妖言頗
興輯獲無遺境內肅然滇黔用兵過陳訛傳搶掠民
皆逃匿芳馳諭陳民曰爾等勿懼有我在兵至果秋
毫無犯尤惓惓於學校輸俸置義田七百餘頃給士

子貧乏者爲膏火貲鄉城設義塾延師分教就學者
免其差徭由是爭自濯磨文風丕振陳人肖像祀之
歌曰前有高公後有孫公以教以養遺惠無窮歷陞
雲南鶴慶知府

李雲景福建晉江貢生由五河縣陞陳州興利除害
殫厥心力在任七年民爲立祠於高橋

蕭國弼遼陽生員以鎮平縣陞知州下車問民疾苦
勸農強撫柔善調兵治民文武和輯訟無冤滯囊無

餘貲早則築壇以禱甘霖立濡潦則令民家設火把

一林隨設隨時修葺學宮開會以饒定禮均役